

氏族典第二百四十七卷

張姓部列傳十五

元二 張泰亨

按元史張泰亨傳泰亨堂邑縣人父山爲管軍百戶泰亨襲職從攻宋釣魚山及樊城征女兒阿塔有功中統二年授銀符侍衛軍總把至元四年陞京東歸德等處新軍千戶從征西川有功授元帥府鎮撫六年改省都鎮撫十二年進武略將軍管軍總管尋進明威將軍從攻潭州矢中鼻拔矢奮戰却敵兵十三年進階武德從征廣西破靜江府十四年還軍潭州金瘡發卒子繼祖襲移鎮鄂州舟過洞庭溺死子震幼以兄顯祖代之二十四年從征交趾陷沒震襲職授昭信校尉管軍上千戶延祐二年覃恩加武略將軍尋進階武德五年陞武節將軍潁州萬戶府副萬戶天曆二年卒子珽襲

張昉

按元史張昉傳昉字顯卿東平汶上人父汝明金大安元年經義進士官至治書侍御史昉性縝密

遇事敢言確然有守以任子試補吏部令史金亡還鄉里嚴實行臺東平辟爲掾進幕職時吏曹雜進不習文法簿書填委漫無統紀昉坐曹躬閱案牘咸得其當事無留滯乙卯權知東平府事以疾辭家居養母中統四年參知中書省事商挺鎮巴蜀表爲四川等處行樞密院參議至元元年入爲中書省左右司郎中甄別能否公其黜陟人無怨言三年遷制國用使司郎中四年丁內憂哀毀踰制尋詔起復錄囚東平多所平反七年轉尙書省左右司郎中九年改中書省左司郎中十一年拜兵刑部尙書上疏乞骸骨致其事卒追封東平郡公諡莊憲子克適平陰縣尹孫振祕書著作郎授中書省左都司事拱常德路蒙古學教授

張世澤

按元史張拔都傳拔都子忙古台忙古台子世澤從丞相伯顏南征大小十餘戰皆有功明年拜宣武將軍總管未幾遷副萬戶加明威將軍從鎮南王脫歡伐交趾旣還及再舉將校舊嘗往者許留恤之有脫歡者當行適病不能起世澤力請代之凱還人服其義云

張子良

按元史張子良傳子良字漢臣涿州范陽人金授榮祿大夫總管陝西東路兵馬治宿州歲戊戌率泗州西城二十五縣軍民十萬八千餘口因元帥阿朮來歸太宗命爲東路都總帥授銀青榮祿大夫陞京東路行尙書省進金紫光祿大夫癸丑憲宗命爲歸德府總管管領元附軍民中統二年夏四月世祖命爲歸德泗州總管仍管領泗州軍民總管七年罷元管戶隸諸郡縣改授昭勇大將軍大名路總管兼府尹八年卒追封清河郡侯諡翼敏子二人長懋次亨亨佩金虎符爲管軍千戶子與立襲卒子鑑襲

張雄飛

按元史張雄飛傳雄飛字鵬舉琅琊臨沂人父琮仕金守盱眙金人疑之罷其兵柄徙居許州尋復命守河陰仍留家人於許雄飛幼失母琮妾李氏養之國兵屠許惟工匠得免有田姓者琮故吏也自稱能爲弓且詐以雄飛及李氏爲家人由是獲全遂徙朔方雄飛時方十歲至霍州李欲逃恐其累己雄飛知之頃刻不去左右李乃變服與俱還寓潞州金亡雄飛不知父所在往來澤潞求之十餘年入關陝歷懷孟潼華終求其父弗得遂入燕居數歲盡通國言及諸部語至元二年廉希憲薦

之于世祖召見陳當世之務世祖大悅授同知平陽路轉運司事搜抉蠹弊悉除之立御史臺以雄飛爲侍御史雄飛益自感勵知無不言會議立尙書省雄飛力爭於帝前忤旨左遷同知京兆總管府事入爲兵部尙書平章阿合馬在制國用司時與亦麻都丁有隙至是羅織其罪同僚爭相附會雄飛不可秦長卿劉仲澤亦以忤阿合馬皆下吏欲殺之雄飛亦持不可阿合馬怒奏出雄飛爲澧州安撫使十四年改安撫司爲總管府命雄飛爲達魯花赤遷荆湖北道宣慰使十六年拜御史中丞行御史臺事改陝西漢中道提刑按察使未行拜參知政事二十一年盧世榮以言利進用雄飛與諸執政同日皆罷二十三年起爲燕南河北道宣慰使決壅滯黜姦貪政化大行卒于官子五人師野師諤師白師儼師約師野宿衛東宮

張懋

按元史張子良傳子良子懋字之美有父風侍子良官京東故懋領其衆從丞相阿朮軍立歸德府以其軍鎮之移鎮下邳知歸德府事李璫叛濟南以其兵戍蔡州中統元年授泗州軍總把佩金符至元七年擢濟南諸路新軍千戶從丞相伯顏南征懋以勇鷙將弩前行伯顏信用之擢爲省都鎮

撫十三年伯顏上其功宣授懋明威將軍泗州安撫司達魯花赤十四年改安撫司爲總管府置宣慰使以統之拜同知淮西道宣慰司事十六年改授懷遠大將軍吉州路總管懋惡衣糲食率之以儉慎刑平政處之以公新府治設義倉雖能吏不過也十七年二月卒追封清河郡侯諡宣敏子二人文煥以父廕任承務郎江州路瑞昌縣尹文炳三汊河巡檢文煥子珪初爲高安縣尹有異政由是擢爲江西檢校拜南臺御史繼爲淮西江西二道廉訪僉事用能世其家云

張九思

按元史張九思傳九思字子有燕宛平人父滋薊州節度使至元二年九思入備宿衛裕皇居東宮一見奇之以父廕當補外特留不遣江南旣平宋庫藏金帛輸內府而分授東宮者多置都總管府以主之九思以工部尚書兼府事十九年春世祖巡幸上都皇太子從丞相阿合馬留守妖僧高和尚千戶王著等謀殺之夜聚數百人直趨東宮九思適直宿宮中叱宿衛士併力擊賊盡獲之三十年進拜中書左丞兼詹事丞成宗嗣位改詹事院爲徽政以九思爲副使進資德大夫中書左丞會修世祖裕宗實錄命九思兼領史事大德二年拜榮祿大夫中書平章政事五年加大司徒六年進

隋光祿大夫薨子金界奴光祿大夫河南省右丞

張均

按元史張均傳均濟南人也父山從軍伐宋以功爲百戶俄陞總把戰死均襲百戶中統三年從征李璫有功陞千戶領兵守淄州至元十二年授忠翊校尉沂鄒翼千戶從丞相阿塔海戰有功加武略將軍十四年加宣武將軍二十二年陞松江萬戶二十六年從北征擢明威將軍前衛親軍副都指揮使成宗卽位命屯田和林規畫備悉有法大德元年改和林等處副元帥歷宣慰司同知陞都元帥加鎮國上將軍延祐元年卒子世忠襲前衛親軍副都指揮使

張礎

按元史張礎傳礎字可用其先渤海人金末曾祖琛徙燕之通州祖伯達爲通州節度判官遂知通州父範爲眞定勸農官因家焉礎業儒丙辰歲平章廉希憲薦于世祖己未從世祖伐宋凡徵發軍旅文檄悉出其中統元年立中書省以礎權左右司事尋出爲彰德路拘權官復入爲三部員外郎賜金符爲平陽路同知轉運司改知獻州同知東平府事又改知威州至元十四年立諸道提刑

按察司以礎爲江南浙西道提刑按察副使遷嶺南廣西道提刑按察使廣西宣慰使也里脫強奪民財礎按其罪遷嶺北湖南道提刑按察副使授賓州路總管不赴拜國子祭酒尋出爲安豐路總管三十一年卒于官封清河郡公諡文敏子淑衛輝路推官

張君佐

按元史張榮傳榮子奴婢奴婢卒子君佐襲佩虎符砲水手元帥戍蔡州至元十二年從丞相阿朮攻揚州是年冬又從諸軍破常州十三年陞懷遠大將軍揚州平以君佐爲安慶府安撫司軍民達魯花赤十四年賊寇黃州行省命君佐率衆復黃州因以爲黃州達魯花赤十五年加鎮國上將軍仍砲水手元帥十九年命率新附漢軍萬人修膠西閘壩以通漕運二十一年兼海道運糧事是年卒

張玉

按元史張榮實傳榮實子玉襲父職爲懷遠大將軍諸路水軍萬戶至元十六年討吉安叛賊有功加輔國上將軍都元帥鎮黃州改立蘄黃等路都元帥府仍管領本道鎮守軍馬二十一年入朝命

充保定水軍上萬戶二十四年從征交趾累戰有功二十五年師還安南以兵迎戰大戰連日水涸舟不能行玉死焉子輔襲萬戶輔卒子道重襲

張弘綱

按元史張禧傳禧子弘綱字憲臣年十八父禧爲主將所誣繫獄將殺之弘綱直入獄中獄卒併繫之弘綱佯狂謔笑守者易之旣寢遂與其父逸去後從其父攻城徇池屢有功自昭信校尉管軍千戶陞總管廣威將軍招討副使加定遠大將軍招討使盜起安吉弘綱率兵擒之授昭勇大將軍河南諸翼征行萬戶從右丞劉深征八百媳婦國師次八番與叛蠻宋隆濟等力戰而歿追封齊郡公諡武宣子漢當襲職讓其弟鼎漢後爲監察御史累官至集賢直學士鼎襲江陰水軍萬戶

張甫

按山西通志甫襄垣人五世同居至元初旌表

張宗演

按元史張宗演傳正一天師者始自漢張道陵其後四代曰盛來居信之龍虎山相傳至三十六代

宗演當至元十三年世祖已平江南遣使召之至則命廷臣郊勞待以客禮命主領江南道教二十九年卒

張留孫

按元史張宗演傳張留孫者字師漢信州貴溪人少時入龍虎山爲道士有道人相之曰神仙宰相也至元十三年從天師張宗演入朝世祖與語稱旨遂留侍闕下號之上卿命尙方鑄寶劍以賜建崇真宮於兩京俾留孫居之專掌祠事十五年授元教宗師錫銀印尋陞江東道同知宣慰司事大德中加號元教大宗師同知集賢院道教事武宗立召見賜坐陞大真人知集賢院位大學士上尋又加特進仁宗卽位進開府儀同三司加號輔成贊化保運元教大宗師至治元年十二月卒年七十四

張康

按元史張康傳康字汝安號明遠潭州湘潭人祖安厚父世英康早孤力學旁通術數宋呂文德江萬里留夢炎皆推重之辟置幕下宋亡隱衡山至元十四年世祖遣中丞崔或祀南嶽就訪隱逸或

兄斌言康隱衡山學天文地理或還具以聞遣使召康至京師十五年授著作佐郎仍以內嬪松夫人妻之凡召對禮遇殊厚呼以明達而不名久之乞歸田里優詔不許遷奉直大夫祕書監丞年六十五卒子天祐

張珪

按元史張珪傳珪字公端弘範之子也少能挽強命中至元十六年年十六攝管軍萬戶十七年眞拜昭勇大將軍管軍萬戶鎮建康二十九年入朝拜鎮國上將軍江淮行樞密副使成宗卽位行院罷大德三年遣使巡行天下珪使川陝問民疾苦振恤孤貧罷冗官黜貪吏還擢江南行御史臺侍御史換文階中奉大夫遷浙西肅政廉訪使召拜僉樞密院事又拜江南行臺御史中丞謝病歸武宗卽位召拜太子諭德未數日拜賓客尙書省立召拜左丞皇慶元年拜榮祿大夫樞密副使皇太后后以中書右丞相鐵木迭兒爲太師萬戶別薛參知行省政事珪曰太師論道經邦鐵木迭兒非其人別薛無功不得爲外執政車駕度居庸失列門傳皇太后旨召珪切責杖之珪創甚輿歸京師明日遂出國門珪子景元以父病篤告遽歸帝不懌遣參議中書省事換住往賜之酒遂拜大司徒謝

病家居繼丁母憂廬墓寢苦啜粥者三年至治二年起珪爲集賢大學士又拜中書平章政事泰定元年帝開經筵封蔡國公知經筵事二年得旨暫歸三年春上遣使召珪拜翰林學士承旨知制誥帝察其誠病命養疾西山繼得旨還家四年十二月薨珪自號澹菴子六人

張思明

按元史張思明傳思明字士瞻其先獲嘉人後徙居輝州思明穎悟過人讀書日記千言至元十九年由侍儀司舍人辟御史臺掾又辟尙書省掾擢爲大都路治中思明固辭乃改湖廣行省都事元貞元年召爲中書省檢校六曹無滯案遷戶部主事大德初擢左司都事五年轉吏部郎中九年改集賢司直十年除江浙行中書省左右司郎中至大三年遷兩浙鹽運使未上入參議樞密院事改中書省左司郎中皇慶元年再授兩浙鹽運使二年召爲戶部尙書延祐元年進參議中書省事三年拜中書參知政事仁宗卽位近臣疾其持法峭直日構讒間出爲工部尙書帝問左右曰張士瞻居工部得無快快乎對曰勤政如初帝嘉嘆之命授宣政院副使五年除西京宣慰使拜中書參知政事陞左丞及拜住爲左丞相與帖木迭兒各樹朋黨賊害忠良誣以不支蒙古子女口糧餓死四

百人遂廢于家天曆元年起爲江浙行中書省左丞二年復以中書左丞召入覲移告去重紀至元三年卒思明平生不治產不畜財尤明於律與謝仲和曹鼎新同稱三絕諡貞敏

張孔孫

按元史張孔孫傳孔孫字夢符其先出遼之烏若部爲金人所并遂遷隆安父之純爲東平萬戶府參議夜夢謁孔子廟得賜嘉果已而孔孫生因丐名於衍聖公遂名今名旣長以文學名辟萬戶府議事官廉希憲居政府辟爲掾及安童爲相尤禮重之授戶部員外郎出爲南京總管府判官僉四川道提刑按察司事尋陞湖北道提刑按察副使遷浙西改同知保定路總管府事俄拜侍御史行御史臺事至元二十二年除禮部侍郎尋陞禮部尙書擢燕南提刑按察使二十八年改肅政廉訪司使拜僉河南江北行中書省事以何除大名路總管大興學校擢淮東道肅政廉訪司使召還拜集賢大學士久之請老還家拜翰林學士承旨資善大夫致仕大德十一年卒孔孫素以文學名且善琴工畫山水竹石而騎射尤精及其立朝讜言嘉論有可觀者士論服之

張孝忠

按元史張萬家奴傳萬家奴子孝忠爲船橋萬戶少從父軍中好攻戰至元二十二年加明威將軍二十七年詔從西征至沙瓜諸州還賜虎符僉書四川等處行樞密院事院罷以本軍萬戶鎮成都卒

張伯淳

按元史張伯淳傳伯淳字師道杭州崇德人少舉童子科以父任銓授迪功郎淮陰尉改揚州司戶叅軍尋舉進士監臨安府都稅院陞觀察推官除太學錄入本朝至元二十三年授杭州路儒學教授遷浙東道按察司知事二十八年擢爲福建廉訪司知事進階奉訓大夫謁告以歸授慶元路總管府治中行省檄按疑獄衢秀皆得其情大德四年卽家拜翰林侍講學士明年造朝扈從上都又明年卒

張閏

按元史張閏傳閏延安延長縣人隸軍籍八世不異爨家人百餘口無間言室無私藏閏兄顯卒卽以家事付姪聚聚辭曰叔父行也叔宜主之閏曰姪宗子也姪宜主之相護旣久卒以付聚至元二

十八年旌表其門

張昇

按元史張昇傳昇字伯高其先定州人後徙平州昇幼警敏過人既長力學工文辭至元二十九年用薦者授將仕郎翰林國史院編修官預修世祖實錄陞應奉翰林文字尋陞修撰歷遷太常博士至大初改太常寺爲太常禮儀院卽除昇爲判官久之外補知汝寧府部使者舉治行爲諸郡最歷江西行省左右司郎中除紹興總路管昇既謹於繩吏又果於去民瘼故人心悅服歷湖北道廉訪使江南行臺治書侍御史召爲參議中書省事改樞密院判官尋復中書參議至治二年拜治書侍御史明年出爲淮西道廉訪使泰定二年拜陝西行省參知政事尋遷遼東道廉訪使召拜侍御史天曆初出爲山東道廉訪使踰年召爲太禧院副使除河南省左丞復遷淮西道廉訪使乞致仕至順二年復起爲集賢侍講學士元統元年告省先墓歸至正元年卒諡文襄

張復

按萬姓統譜復字剛父博學工詩文與趙子昂牟應龍輩號吳中八俊

張文瑞

按萬姓統譜文瑞真定人時方用武文瑞在軍中日以文章自隨至元初授棠邑尹清介自立及代父老借留適京師始立總管召爲經歷政聲益聞歷遷同知濬州事首葺廟學作興士類子淵亦知濬州

張樞

按萬姓統譜樞字子長金華人聰慧爽朗于書無所不讀嘗譏宋高宗忘親事讎而迺爲之定復兩宮之計時前代遺老尙存無不降嘆後漢書七十三卷是非予奪咸有論著名曰訓志詔取藏於宣文閣累辟不起士論高之

張簠

按樂陵縣志簠字公文樂陵人由國子伴讀歷至嘉議大夫同僉太常禮儀院事卒贈通議大夫禮部尙書追封清河郡侯諡孝穆

張策

按樂陵縣志策字公略國子伴讀累官至河南東西道兼訪司僉事孝感芝生詔旌宅里

張飛卿

按樂陵縣志飛卿監察御史拜太醫院使累官至左丞護軍封清河郡公秉身剛正不畏強禦

張與棣

按元史張宗演傳宗演卒子與棣嗣爲三十七代襲掌江南道教至元三十一年入覲卒於京師

張與材

按元史張宗演傳宗演子與棣卒元貞元年弟與材嗣爲三十八代襲掌道教大德五年召見于上都幄殿八年授正一教主主領三山符錄武宗卽位來覲特授金紫光祿大夫封留國公錫金印仁宗延祐三年卒

張子夔

按元史孔全傳張子夔安西人父喪每夜半以背負土肘膝行地匍匐至葬所篩細土爲墳以有司所請表異之